

INUIT ATAQATIGIIT INATSIARTUNI



UKA2025/37

Ulloq 1. Oktober 2025

Nivi Heilmann Efraimsen

Pigisanik aalaakkaasunik piginnaatitaaffimmik pisisarnek imaluunniit atuisinnaatitaaneq pillugu Inatsisartut inatsisaat.

(Ineqarnermut, Attaveqaasersuutitut Isorliunerusunullu Naalakkersuisoq)

Oqaaseqaat.

Inuit Ataqatigiinniit Inatsisartut inatsisissaattut Naalakkersuisut siunnersuutaat ima oqaaseqarfigerusupparput:

Inuit Ataqatigiinniit siullertut oqaatigerusupparput pingaartilluinnaratsigu Inatsisartut inatsisissaattut siunnersuutit Kalaallit Nunaanni najugaqartunut tamanut pitsaanerpaamik atugaqalernissamik siunertaqarlutillu atuuffeqassasut. Pingaarteqaarpummi inuiaat Kalaallit nunaminni salliutinneqarlunarlutik periarfissaqartitaanissaat inuunissaallu.

Nuna tummisarput siulitta uagutsinnut kingortassiaat, uagut aamma kingulissatsinnut pitsaasumik tunniunnissaa Inuit Ataqatigiinniit qulakkerinneqataaffigissallu annertuunik sulissuteqarlutalu pingaartitaraarput.

Ullumikkut pissutsit aallaavigalugit una Inatsisartut inatsisissaattut Naalakkersuisut siunnersuutaat tamakkiisumik isumaqatigaarput, piaartumillu atuutinneqalernissaa kissaatigalugu.

Kalaallit Nunaata nunarsuarmioqatitsinnit ilisimaneqarnerujartornera aammalu tatiniarneqarnera ilutigalugu pissusissamisoorluinnarpoq pigisanik aalaakkaasunik piginnaatitaaffimmik pisisarnek imaluunniit atuisinnaatitaaneq pillugu Inatsisartut inatsisissaattut siunnersuuteqartoqarnera.

Inatsisartut inatsisaata qulakkiissavaa inunnut danskisut innuttaassusilinnut Kalaallit Nunaanni pigisanik aalaakkaasunik piginnaatitaaffimmik pisisarnek imaluunniit atuisinnaatitaaneq pillugu inatsiseqalernermi illersugaallutillu siulliunneqartuarnissaat.

INUIT ATAQATIGIIT INATSIARTUNI



Taamaalilluni aamma namminerisamik illusinermi attartorluniluunniit
ineqarnermi akigititaasut qaffakkiartupiloornissaat
pakkersimaaneqarsinnaassalluni.

Nunatsinni najugaqartut taakkuussapput nunatsinni salliujuartut. Nunat
anigaasaatilissuit nunatsinni pigisaqaraluttunnarnernikkut anigaasaqarnikkut
ineriartornitsinni sunniuteqarpallaarujussualernissaat
pakkersimaarneqartariaqarpoq. Tamanna nunanik suleqateqarneq kisiat
eqqarsaatiginagu aammalu uagut nunatut inuussutissarsiornikkut
anigaasaqarnitsigut nammineq ineriartorsinnaanerput eqqarsaatigalugu
sinaakkusiinissarput pisariaqarpoq. Inuussutissarsiornikkut takornariaqarnikkut
pissutsit eqqarsaatigalugit aamma isiginiagassagut arlaqarput.
Takornariartitseqatigiiffiit nunatsinni illusisarput, nunaqavissullu
ineriartorsinnaanerannut periarfissaq taamaasilluni annikinnerulerluni.
Taamaammat isiginiassat assigiinngitsut tunngavingalugit siunnersuut
ataatsimiititaliamut susassaqartumut innersuupparput.